

## lis Gnovis

■ **BRUSSEL.** Trasformazion ecologicje e sociâl

Anche chest an, in grazie di «Sbilanciamoci» (la rêta taliane di clapis impegnadis par controlâ la spese publiche e par promovî politicis economicis alternativis), si podarà lei par talian il Rapuart «EuroMemorandum». L'edizion pal 2021 e je intitulade «Un'Agjende pe trasformazion sociâl e ecologicje da l'Europe daspò de pandemie». Il scandai al è curât di un trop di economicis europeus impegnâts te promoziun de justizie sociâl e de sostenibilitât ambientâl. Il document al pues jessi scrutinât a la direzion: [sbilanciamoci.info/la-trasformazione-che-serve-allue-il-nuovo-euromemorandum/](http://sbilanciamoci.info/la-trasformazione-che-serve-allue-il-nuovo-euromemorandum/).

■ **LONDRE.** Politichis divisivis e distrutivis

Al è saltât fûr e al pues jessi let su la rêta des rêts il «Rapuart 2020-2021», dulà che «Amnesty international» al rint cont des violacions dai dirits dal om ch'a son stadis regjistradis e documentadis in 149 Paîs dal mont ([www.amnesty.it/rapporti-annuali/rapporto-2020-2021/](http://www.amnesty.it/rapporti-annuali/rapporto-2020-2021/)). An passât, par colpe de pandemie, injustizis e violacions a son cressudis, par colpe di «politichis divisivis e distrutivis che, di biele pueste, a an perpetuât disparitâts, discriminazions e opression, vierzint la strade al fisc produsût dal virus». Seont «Amnesty», lis categoriis plui penalizadis a risultin lis minorancis etnichis, i dispatriâts, i viei e lis feminis, biel che «il mont si sint malsigûr e plen di pôre in face di une clime internazionâl dulà che si continue a uçâ l'asse e la division».

■ **NERT E CAS.** «Decrescita Bike Tour»

Dai 18 ai 27 di Jugn, il «Movimento per la Decrescita Felice» al torne a organizâ il «Decrescita Bike Tour», un'esplorazion ciclistiche fra i dams causonâts dal svilup e i progjets alternativis par un resuriment acetabil e sostenibil. L'edizion dal 2021 e partissarà dal Friûl, su la dighe dal Vajont. In 5 dis di pedaladis plui altris 5 dis di confronts e di dibattiments, i escursioniscj a rivaran, dopo 300 chilometris, fin Padue, traversant lis cuelinis dal Prosec, la Basse venite e la lagune di Vignesie. Tal lûc [www.decrecitafelice.it/2021/03/bike-tour-2021/](http://www.decrecitafelice.it/2021/03/bike-tour-2021/), si cjate ogni informazion necessarie pe partecipazion.

■ **GURIZE.** Festival dal svilup sostenibil

E je tornade a partî la machine pe organizazion dal «Festival dal Svilup sostenibil», la plui grande e la plui inludrisade iniziative di societât civil taliane dedicate a la sostenibilitât e a la realizazion de «Agjende 2030» des Nazions unidis pal svilup sostenibil. L'Alleanza taliane pal svilup sostenibil, «Asvis», e je daûr a programâ il Festival dai 28 di Setembar ai 14 di Otubar, par 17 dis, un par ognidun dai obietifs/Goals de «Agjende» Onu.

<b>Miercus 21</b>	S. Anselm di Aoste v.	<b>Domenie 25</b>	S. Marce.
<b>Joibe 22</b>	S. Teodôr vescul	<b>Lunis 26</b>	S. Marcellin pape
<b>Vinars 23</b>	B. Eline Valentinis	<b>Martars 27</b>	S. Zite vergjine
<b>Sabide 24</b>	S. Ermini vescul	<b>Il timp</b>	Cualchi ploie.



**Il soreli**  
Ai 21 al iève aes 6.10  
e al va a mont aes 20.02.



**La lune**  
Ai 27 Lune plene.

**Il proverbi**  
Il prometi al è dret,  
il mantignil al è çuet.

**Lis voris dal mès**  
Je ore di coltà pomodoros e melanzanis  
e di rari lis plantis cressudis masse fissis.

## Firmis pe «Rai» furlane

Diego Navarria al à inviât une petizion informatiche gnove

Une petizion par domandâur al Guvier e a la «Rai» che la lenghe furlane e sedi plui doprade tal servizi public radiotelevisif: le à inviade, za fa pôcs dis, **Diego Navarria**, prin firmatar e par une dade sindic di Cjarlins.

«Midiant di cheste iniziative – al sclaris – o intindin d'incitâ a ricognossi i dirits de Comunitât linguistiche furlane te programazion de Concessionarie dal servizi public. In altris Regions e Provincis autonomis – al marche Navarria – chescj dirits a son garantîts, in grazie di Convenzions ch'a uffrissin finanziaments e spazis di programazion e d'informazion giornalistiche une vore plui massifs». Struche struche, l'intindiment de petizion – che bot e sclop e à za passât mil firmis – al è chel di fermâ «la disparitât di tratament fra lenghis mancual pandudis», tignint cont che, ai 29 di Avrîl cu ven, e scjât chê Convenzion integrate, fra Presidence dal Consei dai ministris e «Rai», pe trasmission di programis radiotelevisifs par furlan, ch'è veve za in cressudis lis risorsis a disposizion cun altris 750 mil euros ad an.

«Tai ultins mès, la programazion e je stade cetant sclagne – al note Diego Navarria – e, pal plui, e à proponût replichis. In zornade di vuê, o vin 90 oris ad an par radio (cu la priente di altris 17 oris e mieze garantidis cuntune integrazion). Alfin, o vin otignût anche cualchi programe televisif, cun 16 oris e mieze ad an. A nô nus parin pardabon masse pocj, stant che une lenghe si difindile anche cu la pussibilitât di fâ informazion par television».

La petizion, che il so titul al è «Basta minoranze di serie B! Lingua friulana in Rai», e domande che la Strutture di



Il studi dal «TGR» e Diego Navarria

«O domandin plui informazion par furlan, par radio e par television. La nestre lenghe e à chê stesse dignitât di chês altris»

programazion par furlan e cjapi sù personâl competent e preparât par garantî la cualitât dal servizi (là che invezit, in zornade di vuê, i programis furlans a dipendin de Strutture di programazion par talian). Ma e domande anche risorsis finanziariis e investiments strutturâi, tant a di une «Sede Rai», di preference a Udin, adate pal compit e pes necessitâts operativis. «Chest al vûl di potenziâ la redazion di Udin che, tai agns, e je lade al mancual – al sclaris Navarria – e tornâ a meti in vore lis Sedis par corrispondents di Pordenon e di Gurize».

La petizion e domande anche di tornâ a garantî i colegaments cun Udin e cun Pordenon intant dai telegiornâi des dôs dopomisdî, «ch'a son stâts scancelâts cence daûr nissun sclariment ai abonâts dal servizi public».

«In chest moment, al vûl che anche il popul al dedi un sburt; nol baste l'impegn des istituzions, che cualchidune e à pûr si tacât a movisi par che la Convenzion gnove e proviodi un'incressite des oris par furlan. Juste par chel, o soi intervignût come citadin privât – al declare Diego Navarria – cuntune iniziative cence intindiments parziâi o politics, ma ch'è je trasversâl e ch'è je vierte a ducj

chei ch'a fevelin par furlan e ch'a crodin tai valôrs de Costituzione da la Republiche taliane». L'idee, al sere il promotôr de petizion, e je chê di mandâur un segnâl fuert, tirant sù une vore di firmis, a cui ch'al à il compit di decidi e a cui ch'al à il compit di rapresentâ i furlans, in mût ch'a fasin la part dal so dovê par che chest dirit costituzionâl al sedi garantît». Di fat, «La lenghe e je une puarte, no un confin», cemût ch'al à scrit un dai firmataris de petizion, tal lûc internet dulà che si pues firmâle, <http://chng.it/zHPxhNBX> (in plui che tal profil «Facebook» di Diego Navarria e te pagjine «Furlan te Rai. E no dome!»).

Monika Pascolo

## Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», daprûf dal domo. Sabide ai 24 di Avrîl al cjantarà messe pre' Davide Larice. Radio Spazio e trasmet sul moment la liturgjie.

I progjets «Il ream dai fruts», «Sacheburache» e «Vosutis te sachete» par scoltâ, balâ e cjantâ par furlan  
Arlef, 27 gnûfs videos musicâi par fruts

«Il Ream dai Fruts», «Sacheburache», «Vosutis te sachete». A son chescj i trê gnûfs progjets destinâts ai plui piçui e promovûts de ARLeF-Agjenzie Regionâl pe Lenghe Furlane. Vincjesiet videos in dut, caracterizâts di un unic fil ros: la musiche, par scoltâ, balâ e cjantâ par furlan. Un lengaç semplic e universâl, che al rivarà ai siei destinataris, i fruts tra i 3 e i 10 agns, cun filmâts che si puedin cjatâ sul canâl YouTube de Agjenzie, inte sezion pai fruts dal sit [arlef.it](http://arlef.it) e in curt anche tal gnûf sit dedicât ai plui piçui [www.ghiti.it](http://www.ghiti.it). Tal câs di «Il Ream dai Fruts», a son stâts realizâts anche i DVD che a saran inviâts aes scuêles di infanzie e a chês primariis, a supuart dal insegnament de lenghe furlane.

«A son trê progjets diviers, ma che a san a doprâ in maniere originâl la musiche e lis imagjins (in cualchi câs doprant i cartons animâts) tant che strument par coinvolzi i fruts, insegnantjur, in maniere divertente, la marilenghe», al à marcât il president de ARLeF, Eros Cisilino, in ocasion de videoconferenze di presentazion dai progjets, dulà che an partecipât anche l'assessor regionâl aes lenghis minoritariis, Pierpaolo Roberti, Alberto Zeppieri par Numar Un, Elisabetta Ursella par Belka Media, e Martina Franceschina pe associazion Beltram di Aquilee. «I videos a son indreçâts a un public une vore zovin cun messaçs siôrs di valôrs educatîfs e a rapresentin un strument di utilitât sigure – al à comentât Roberti – pe difusion dal furlan sedi intes fameis che

inte scuêles. Si trate, cun di plui, di materiâi audiovisifs produsûts cun cualitât e professionalitât di bande di associazions, coordenadis de ARLeF, che a podaran rapresentâ pal servizi public une ocasion impuartante par implementâ la ufierte di programs in lenghe furlane». «Il Ream dai Fruts» (Numar Un), al è la version in lenghe furlane dal famôs program argentin «El reino infantil», cu la traduzion des cjanzons e cul adattamento dai personaçs al contest furlan. «Sacheburache» (Belka Media) al à «pescjât» invezit tra lis nainis de tradizion orâl, proponintlis anche intune version rap originâl. «Vosutis te sachete» (Associazion musicâl «Beltram di Aquilee»), al presente cjanzons ineditis in marilenghe, modernis e appassionantis, cjantadis dai fruts stes.